

# SAD i EU razmatraju finansijski slom Irana

15 februar 2012 Izmijenjeno 08:30 CET

**SAD i Evropa razmatraju izbacivanje Irana iz međunarodne bankarske mreže SWIFT, što bi odmah dovelo do ekonomskog kolapsa**



Novе sankcije znatno bi ugrozile standard iranskih građana [AFP/Getty]

Sjedinjene Američke Države i Evropa razmatraju dodatno kažnjavanje Irana koje bi moglo momentalno dovesti zemlju do finansijskog sloma, prenosi AP. Administracija američkog predsjednika Baracka Obame želi da Iran bude izbačen iz SWIFT-a, nezavisne finansijske bankarske mreže preko koje se obavlja prodaja iranske nafte u inostranstvu. Preduzimanje ovog poteza navodi da SAD i Evropa traže način da se Iran primora da se brže vrati razgovorima o svom nuklearnom programu, ili da se ta zemlja uspori u, kako tvrde zapadne zemlje, pravljenju nuklearne bombe.

Iran odbacuje navode Zapada i tvrdi da razvija nuklearni program isključivo u mirnodopske i medicinske svrhe.

## Lošiji standard

Prema navodima američkih zvaničnika uključenih u pregovorima o SWIFT-u koje prenosi AP, takvo kažnjavanje Irana moglo bi dovesti do povećanja cijene nafte i ugroziti standard iranskog naroda. Američki zvaničnici su željeli ostati neimenovani jer nemaju službenu dozvolu za otkrivanje informacija medijima. SAD ne može samostalno narediti da Iran bude isključen iz SWIFT-a (Društva za svetske međubankarske finansijske telekomunikacije), te zato vodi pregovore s Evropom, kazali su američki zvaničnici. Također se pregovara o mogućnosti ograničavanja pristupa Irana bankarskoj mreži za skupljanje naftnog profita, ukoliko bude odlučeno da Iran neće biti potpuno izbačen iz SWIFT-a.

Predstavnici SWIFT-a, koji pregovaraju u Washingtonu, sastat će se sa zvaničnicima Evropske unije ove sedmice, kazao je za AP američki zvaničnik upoznat s pregovorima. Kazao je kako se očekuje da će EU narediti SWIFT-u da izbaci barem neke već sankcionirane iranske banke, iako se ne zna da li će se ova odredba odnositi i na Iransku centralnu banku.

## Neutralnost mreže

Više od 40 iranskih banaka i institucija koriste SWIFT. Izbacivanje iz ove međunarodne mreže naštetilo bi i građanima Irana, jer bi se povećale cijene potrošačkih dobara dok bi pala vrijednost iranske valute. SWIFT omogućava međunarodne transfere novca za više od 10.000 finansijskih institucija i kompanija u 210 zemalja. Omogućava korisnicima da sigurno razmjenjuju finansijske podatke. Glasnogovornik SWIFT-a nije davao direktne komentare o Iranu. Međutim, u saopćenju objavljenom na svojoj internet stranici, navodi se da "SWIFT ostaje odlučan u svojoj ulozi neutralne globalne finansijske komunikacijske mreže koja poštuje zakone sankcija". Također se navodi da je SWIFT odlučan u borbi protiv zloupotrebe finansijskog sistema u svrhu finansiranja terorizma, te da sarađuje sa zakonodavnim tijelima u SAD-u i Evropi.

Izvor: Al Jazeera